

Uunga siunnersuut: Naartunermi, erninermi meeravissiarthaarnermilu sulinngiffeqartarneq pillugu Inatsisartut inatsisaat nr. xx, xx. xxx 2020-imeersoq
(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

Akissuteqaat

(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

Aappassaaneerneqarnera

Naartunermi, erninermi meeravissiarthaarnermilu sulinngiffeqartarneq pillugu Inatsisartut inatsisissaattut siunnersuummut atatillugu Ilaqutariinnut Peqqissutsimullu ataatsimiititaliap peqqissaartumik sulisimaneranut siunnersuummillu tigusilluarsimaneranut Naalakkersuisut qujarusupput.

Ataatsimiititaliami tamarmiusut isumaqatigiissutigalugu siunnersuummik taamannak isikkoqartillugu ilaliinerat Naalakkersuisut nuannaarutigaat.

Arnat namminersorlutik savaateqarnermik, aalisarnermik piniarnermilluunniit inuussutissarsiuteqartunik aappaqartut, taamalu arnat sulinngiffeqarnermi pisartagassat amerlassusilernissaannut isertitanut tunngavissanik takussutissaqanngitsunut, siunissami aaqqiissuteqarfigineqarnissaasa sulissutigineqarnissaannik ataatsimiititaliap kajumissaarinera Naalakkersuisunit maluginiarneqarpoq.

Angajoqqaat meeqqallu pitsaasumik toqqissisimanartunillu atugassaqarlutik aallartilluarsinnaanissaat pingaaruteqarpoq. Ilaqutariit meerartallit atugaasa pitsanngorsarniarlugit suleriaqqinnissamut eqarsaatersuutitut ataatsimiititaliap innersuussutaat Naalakkersuisunit taamaammat ilanngunneqassapput.

Taamannak oqaasertalerlugu Naalakkersuisut siunnersuut aappassaaniigassanngortippaat.